

TUCURI JUAN

Gayoda saludashcamunda

1 ¹ Crijcunada pushaj yuyij gashami cabishcadi c'uyashca Gayomu escribini. ² C'uyashca huauqui, ima layami cambuj espíritu allí catin shinaidi ima unguish illuj gachun can tuquigunabi allí rishca gachunmi Diosta mañani. ³ Ima urami maijin huauquiguna shamusha can ima laya cabishca shimigunada p'actachisha catigushcada parluquimi pachundi cushiyarigani. ⁴ Ñucaj huahuagunamunda, “Cabishcada rurusha purigun,” nijta uyusha tuquimunda yallidami cushiyarini.

⁵ C'uyashca huauquilla, na rijsishcaguna gaquish crijcunamunga can imada ruragushash allí allimi ruraj gangui. ⁶ Paigunaga can shina c'uyashcadaga crijcuna tandanucushcabimi yachi chayachiguna. Diosbujta rurujcuna gashca shina paiguna rigushcamu richun imallanbish can ayudana allinmumi. ⁷ Diosta na rijsijcunamunda imadash na japishalla paigunaga Jesusbuj shutida c'uyushcallamundami llujshisha rigaguna.

⁸ Shinusha ñucuchiga cabishcada rurujcunanga igulda rurujcuna gangau paigunada imanbish ayudanami ganchi.

Diotrefesmundash Demetriomundash

⁹ Tandanucushca crijcunamu ña escribiganiami. Ashtanbish Diotrefesca paigunapuramunda paidij ñaibuquí gangu munushami ñucuchidaga na japisha nin. ¹⁰ Shinusha ñuca rishaga pai ima ruragushcagunadaga ñucuchida na allí shimigunan llagmusha purishcada

yuyachishami rimasha. Paiga na cailladash rurash ninchu, ashtanbish chi huauquiguna chayquish na japinchu; paigunada japish nijcunadash ama japichun jarcanmi, japiquiga crijcunapuramundash llujshichishtanmi.

¹¹ C'uyashca huauqui, pai na allida rurashcadaga cambish shinaidijca ama rurichu, ashtanbish alligunaida ruri. Allida rurajca Diosbujmi. Na allida rurajcarin Diostaga na rijsishcachu.

¹² Demetriomundaga tuquigunami alli nin, pai cabishcada ruragushcaidiquish alli gashcada ricuchin. Ñucuchidiquish paimundaga allimi parlanchi, ñucuchi cabishcada parlagushcadash yachunguimi.

Tucuchingaj yuyiguna

¹³ Canmuga milgalladadi ninagunadami charigani. Shinash tintallan plumallanga na escribisha ninichu.

¹⁴ Chibuj randiga ñahui ñahui ricunucusha ñadi parlanucungumi shuyaguni. ¹⁵ C'uilla causiga cangun gachun. Cangun alli apanucujcunash '¿Allillachu gangui?' ningunami. Ñucuchin apanucujcunadash shuj shujlla tuquigunada 'Allilla gashca gachun' nibangui.